

# “Te Ke Fie Ha'u ki Hoku Papitaisó?”

Fai 'e Rebecca Hogg  
mo Eric B. Murdock  
(Makatu'unga 'i ha talanoa mo'oni)

“Oua na'a manuki'i ho'o kei si'i 'e ha taha; ka ke 'i he kakai tui ko e faka'ilonga”  
(1 Tīmote 4:12).

Ne 'ikai fa'a tatali 'a 'Ōliva ke 'osi e uiké. Ko e uike hokó 'a e 'aho lahi kuó ne tatali ki ai talu mei he'ene ta'u faá. 'E papitaiso ai ia.

Na'e fiefia 'aupito 'a 'Ōliva 'i hono papitaisó peá ne fie ma'u ke kaikaila 'aki ia mei he 'ato 'o e ngaahi falé ke fanongo ki ai 'a 'Ingilani kotoa! Ne 'ikai ke ne fa'a tatali ke talaange ki hono kaungāme'a ko Tileni 'i he 'apiakó.

“Oku 'ikai ke u tui ki ai. Kuo faifai pea mei hoku hoku 'aho papitaisó,” ko e lea ia 'a 'Ōlivá. “E faka'ofa'ofa ia!”

“Na'á ku pehē 'e au ko e fanga ki'i pēpē pē 'oku papitaisó.” Na'e hangē na'e puputu'ú 'a Tileni.

Ne talaange 'e 'Ōliva, “Kuo pau ke ta'u valu pe lahi ange e fānaú kae toki papitaiso kinautolu 'i he

Na'e fie kaila 'aki ia 'e 'Ōliva mei he 'ato 'o e ngaahi falé ke fanongo ki ai 'a 'Ingilani kotoa!



Siasi 'o Sīsū Kalaisi 'o e Kau Mā'oni'oni 'i he Ngaahi 'Aho Kimui Ní. Ko hoku Siasí ia.”

“Tōatu,” ko Tileni ange ia.

Ne fakafokifā pē hono ma'u 'e 'Ōliva ha fo'i fakakaukau. “Te ke fie ha'u ki hoku papitaisó?”

“Io,” ko Tileni ange ia. “Ka 'oku fie ma'u ke u 'uluaki kole ki he'eku ongomātu'á.”

“Sai ia!”

Na'e fiefia 'a 'Ōliva he mahalo 'e ha'u 'a Tileni ki hono papitaisó. Na'á ne toe ma'u ha fakakaukau 'e taha. “Oku 'ikai ke u fie ma'u ke ha'u pē ha kaungāme'a 'e toko taha ki hoku papitaisó. 'Oku ou fie fakaafe'i e kakai tokolahi taha te u ala lavá!” Ne fakavavevave atu 'a 'Ōliva ki honau 'apí pea talaange ki he'ene Fine'eikí 'oku 'i ai ha'ane palani.

I he Sāpate 'aukai kimu'a pea papitaiso iá, ne kamata 'e 'Ōliva 'ene palaní. Na'á ne vahevahe 'ene fakamo'oni mei he tu'unga malangá; pea na'á ne pehē, “Oku papitaiso au 'i he Tokonaki kaha'ú, pea 'oku ou fie ma'u ke ha'u e taha kotoa! Kātaki mu'a, te mou lava 'o fakaafe'i mai ha taha pē 'okú ke 'ilo'i 'oku 'ikai ko ha mēmipa pe 'oku 'ikai ha'u ki he lotú, ki hoku papitaisó?” Na'á ne ongo'i hangē ko ha faifekau iá. Na'á ne sa'ia 'aupito 'i he ongo ko iá.

I he uike hono hokó, ne fakaafe'i 'e 'Ōliva e ngaahi kaungāme'á, kau mēmipa 'o e fāmilí, mo e kau faiakó ki hono papitaisó.

Na'á ne talaange kiate kinautolu, “Te u fiefia lahi kapau te mou ha'u!”

NGAAHI TA FAKATATA 'A BROOKE SMART



I he ofi mai 'a e 'aho Tokonakí, ne kamata ke fifili 'a 'Ōliva pe ko e toko fiha nai 'e ha'ú. 'E fēfē nai kapau te nau fu'u femo'uekina kotoa pe 'ikai ke nau fie ha'u?

Na'á ne fai ha ki'i lotu nounou ke ha'u pē ha ni'ihī tokosi'i meiate kinautolu na'á ne fakaafe'i. Pea 'ikai leva ke ne toe hoha'a pe ko hai 'e ha'ú. Na'á ne 'ilo kuó ne fai ha me'a lelei 'i hono fakaafe'i pē kinautolú. 'Ikai ngata aí, ko e me'a mahu'inga taha 'i he 'aho ko iá, ko hono papitaisó ia.

I he'ene a'u ki he 'apisiasí 'i hono 'aho papitaisó, ne 'ikai ke mei tui 'a 'Ōliva ki he me'a ne mamata ki aí. Ne 'i ai ha tokolahi hono ngaahi kaungāme'á ke pou-pou'i ia. Na'á ne vakai atu foki ki ha falukunga kakai ne 'ikai ke maheni mo ia. Na'á ne ta'ata'alo atu kia Tileni 'i he'ene hū mai mo 'ene ongomātu'á.

I he hokosia e taimi ke papitaiso aí, ne hifo 'a 'Ōliva ki he vai māmāfaná. Ne puke 'e he'ene tangata'eikí hono nimá, 'o hangē ko 'ena fakaangaangá. Na'á ne fai leva e ki'i lotu nounou 'o e papitaisó pea tuku hifo 'a 'Ōliva ki he loto vaí. Tuaeikemo, kuo toe tu'u hake 'a 'Ōliva—kuo pīponu ka na'á ne malimali. Na'á ne 'ilo'i na'á ne muimui ki he tā sīpinga 'a Sīsú.

Hili e fetongi 'a 'Ōlivá ki hono vala mātu'ú, na'e fakama'u ia ko ha mēmipa 'o e Siasí 'e he'ene tangata'eikí mo ha kau tangata toko si'i kehe pea foaki ange ha tāpuaki makehe, 'a ia na'a nau fakaafe'i ia ai ke ne ma'u e Laumālie Mā'oni'oni. Hili iá, ne kole 'e 'Ōliva pe 'e lava ke vahevahe 'ene fakamo'oni.

“Mālō 'aupito ho'omou ha'u ke pou-pou'i au he 'aho makehe ko 'ení. 'Oku ou fiefia lahi 'aupito ai,” ko 'Ōliva ia. “Oku ou hounga'ia 'i hono papitaiso aú, pea 'oku ou tui ko e Siasí 'eni 'o Kalaisi 'i he māmaní.”

Hili iá, ne omi e kakai 'o talamonū ange kia 'Ōliva.

“Mālō mu'a hono fakaafe'i aú!” Ko Tileni ange ia. “Na'á ku ongo'i loto māfana.”

“Ne anga'ofa e taha kotoa!” Ko e talaange ia 'e he fine'eiki 'a Tileni. “Na'a mau ongo'i ne talitali lelei kinautolu.”

I he pō ko iá, ne tangutu hifo e Tangata'eikí 'i he ve'e mohenga 'o 'Ōlivá. “He toki 'aho faka'ofa'ofa mo'oni!” Ko e Tangata'eikí ange ia.

Ne kamokamo pē 'a 'Ōliva. “Oku ou fiefia 'i he'eku kau fakataha mo hoku kaungāme'á.” ●

'Oku nofo 'a e ongo fa'u tohi 'i Keni, 'Ingilani, mo Tutā, USA.

